



PREDSTAVNIČKI / ZASTUPNIČKI DOM

ПРЕДСТАВНИЧКИ ДОМ

Safet Kešo

Sarajevo, 4.11.2024.godine

BOSNA I HERCEGOVINA PARLAMENTARNA SKUPŠTINA BOSNE I HERCEGOVINE SARAJEVO			
PRIMLJENO: 08-11-2024			
Organizaciona jedinica	Klasifikaciona oznaka	Redni broj	Broj priloga
01-	50-4-	2173	24

- Visokom predstavniku međunarodne zajednice u BiH g Kristijanu Šmitu

U skladu sa članom 166. Poslovnika Predstavničkog doma Parlamentarne skupštine Bosne i Hercegovine

upućujem pitanja Visokom predstavniku u BiH gospodinu Kristijanu Šmitu:

Poštovani gospodine Šmit,

U 66-om izvještaju Vijeću sigurnosti Ujedinjenih nacija o stanju u Bosni i Hercegovini, kojeg u skladu s mandatom Visokog predstavnika međunarodne zajednice u našoj zemlji personalno potpisujete i podnosite, i u kojem ste tretirali brojne druge značajne teme, uvrstili ste i pitanje izgradnje interkulturnog centra „Mevlana“ u Mostaru. Učinili ste to, zanimljivo je, sljedećim riječima:

“Kontroverza koja traje oko izgradnje Mevlana Interkulturnog centra na spornoj lokaciji u Mostaru nastavlja se. Mevlana Interkulturni centar u Mostaru se doživljava od hrvatske političke grupe, uključujući Hrvatsku demokratsku zajednicu Bosne i Hercegovine (HDZ BiH), kao strateški potez za afirmaciju bošnjačke prisutnosti u pretežno hrvatskom zapadnom dijelu grada”.

U vezi sa citiranim dijelom Vašeg izvještaja zamolio bih Vas da mi odgovorite na sljedeća pitanja:

1. Zašto ste ovu veliku i društveno izuzetno korisnu i zdravu ideju izgradnje Mevlana interkulturnog centra, iznimno važnu za obnovu poznatog građanskog i multietničkog duha Mostara kao i za sve njegove žitelje različitih vjera, kultura i nacija, nazvali KONTROVERZOM, stavivši je na ovaj način vlastitom rukom pod znak pitanja? Šta je to, po Vašem mišljenju, kontroverzno u ideji izgradnje jednog interkulturnog centra u gradu i zemlji koja vapi za priključenjem Evropskoj uniji kao globalnom uzoru upravo takvog - interkulturnog, multietničkog i multireligijskog društva? I nije li kontroverzan upravo način na koji ste se, i osobno i institucionalno, referirali o ovoj temi u svom izvještaju za Vijeće sigurnosti!?
2. Zašto ste u citiranom dijelu svoga izvještaja lokaciju za izgradnju navedenog interkulturnog centra nazvali SPORNOM? Za koga konkretno je navedena lokacija sporna i da li ste, prije nego što ste je tako zvanično opečatili u svom izvještaju, obavili razgovore i sa stranom koja je inicirala ideju izgradnje pomenutog centra na lokaciji koju ta strana (Islamska zajednica) ni po čemu ne smatra spornom?
3. Kojoj svrsi služi rečenica iz Vašeg izvještaja koja glasi: “Mevlana Interkulturni centar u Mostaru se doživljava od hrvatske političke grupe, uključujući Hrvatsku demokratsku zajednicu Bosne i Hercegovine (HDZ BiH), kao strateški potez za afirmaciju bošnjačke prisutnosti u pretežno hrvatskom zapadnom dijelu grada”?!



Zašto smatrate da je čak i samo Vijeće sigurnosti UN trebalo upoznati sa činjenicom da u Mostaru i BiH postoji "hrvatska politička grupa, uključujući i HDZ BiH" kojoj nije prihvatljivo da se gradi interkulturni centar kojim Bošnjaci žele afirmirati svoju prisutnost i "u pretežno hrvatskom dijelu grada Mostara"?!

4. Šta je sporno u ideji i potrebi jednog naroda da svojoj užoj i široj okolini i cijelom svijetu pošalje poruku da je živ i zdrav i da želi i dalje biti prisutan tamo gdje je stotinama godina živio, radio, gradio i stvarao u pristojnom i civiliziranom zajedničkom životu sa sugrađanima svih vjera i svjetonazora!? Zbog čega je i kome je pomenuta potreba jednog naroda da "afirmiše svoju prisutnost" u dijelu grada u kojem vijekovima živi toliko bogohulna i do te mjere zabrinjavajuća da ste našli za shodno da je stavite u svoj Izvještaj Vijeću sigurnosti UN !?

Zar ne primjećujete, gospodine Visoki predstavnike međunarodne zajednice u Bosni i Hercegovini, da ste na ovaj način pokazali i svoje „razumijevanje“ za zabrinutost pomenute "hrvatske političke grupe" i da se stavljate na stranu snaga koje rade na dezintegraciji bosanskohercegovačkog društva i na promociji antievropskih vrijednosti, što je potpuno suprotno misiji Visokog predstavnika međunarodne zajednice u Bosni i Hercegovini?!

S poštovanjem,

ZASTUPNIK

Safet Kešo